

**‘TOPI’ WANITA; CERITERA
PERJUANGAN ANTARA KERJAYA
DAN RUMAHTANGGA**

MAIZURA HJ.MANSHOR


**FAKULTI KOMUNIKASI DAN
PENGAJIAN MEDIA, UITM
CAWANGAN NEGERI SEMBILAN,
KAMPUS REMBAU**

Peranan wanita masakini sudah jauh berbeza. Hakikatnya, pada zaman sekarang, wanita bukan saja berperanan dalam mengurus rumah tangga, tetapi juga sebagai penyumbang ekonomi keluarga. Malahan, tanggungjawab ini bukan hanya dipikul oleh wanita yang telah berumah tangga, tetapi turut menjadi sebahagian tanggungjawab bagi mereka yang belum berkahwin (Siti Nur Husna, Mohd Izhar Ariif & Muhammad Adnan, 2017).

Tidak mudah untuk menjadi wanita berkerjaya. Terutamanya bila wanita tersebut telah berumah tangga dan berkeluarga. ‘Topi’ (peranan dan tanggungjawab) wanita tersebut terpaksa dipakai dan disesuaikan mengikut situasi semasa. Topi sebagai pekerja, topi sebagai isteri, topi sebagai ibu dan ada antara kita yang memakai topi sebagai pelajar atau peniaga *online* pada masa yang sama. Banyaknya ‘topi’ wanita yang harus dipakai pada satu masa! Oh, sebelum mula membaca dengan lebih lanjut, diingatkan yang ini merupakan perspektif peribadi saya. Mohon jangan kecam ya.

“Suami pun sibuk juga”. Betul. Tapi pada kebanyakan masa, kesibukan suami dengan isteri tidak setara bila membabitkan hal rumahtangga. Bukan hendak menabik dada, tapi peranan besar wanita dalam rumahtangga memang tak dapat nak disangkal. Bayangkan, dari menyiapkan anak ke sekolah pagi-pagi, memasak sarapan, menggosok pakaian kemudian keluar bekerja. Balik ke rumah, dapur perlu berasap juga. Lama mana larat nak makan di luar atau bungkus makanan? Baju perlu dibasuh dan disidai pula. Rumah perlu dikemas juga. Kerja sekolah anak-anak? Lipat kain baju? Kemas dapur? Kebanyakan masa siapa yang buat semua? Sang ibu juga. Tapi

ada juga antara kita yang bertuah, punya suami yang ringan tulang membantu buat kerja. Rezeki tu!! Kerana itulah anak lelaki dari sekarang jangan terlampau dimanja. Suruh saja buat kerja rumah sama macam anak perempuan juga. Untuk kesenangan waris keturunan kita juga di masa hadapan.



Sumber: <https://www.mother.ly/news/working-motherhood-viral-comic>

Imej di atas sangat relevan buat wanita yang berkerjaya dan berumah tangga dalam satu masa. Bukan bersifat seksis terhadap wanita, tapi inilah hakikat sebenar kehidupan para isteri yang punya banyak ‘topi’ pada satu tika. Dalam meladeni tanggungjawab sebagai pekerja, dalam masa yang sama masih lagi perlu mendepani hal-hal tanggungjawab rumahtangga, inilah perjuangan dan cabang jihad para isteri dan ibu. Percayalah, kaum wanita tampak saja lemah, tapi hakikatnya hatinya cekal seperti batu. Bukan memuji diri sendiri apatah lagi mendabik dada. Tetapi, inilah realiti buat semua kita yang bekerja.



Berdasarkan fakta di atas, sumber dari Jabatan Perangkaan Malaysia (November 2019), kadar penglibatan tenaga kerja wanita meningkat sebanyak 55.2 peratus pada tahun 2019 manakala anggaran jumlah pendapatan yang diperolehi wanita juga turut meningkat kepada

RM35,508 pada tahun yang sama jika dibandingkan dengan data 2018. Wanita juga mendominasi pencapaian dalam sektor pendidikan di semua peringkat; rendah, menengah dan tinggi. Hal ini menunjukkan yang wanita juga berdiri hampir sama tinggi dengan lelaki dari sudut kerjaya hakiki di sebalik ‘topi’ mereka sebagai ibu dan isteri. Realiti hari ini, ada antara kita yang yang bekerja dari pagi hingga lewat malam, memakai ‘topi’ berasingan demi ekonomi rumahtangga ataupun pencapaian diri. Tidak membawa kepada feminisme, tapi hakikat ini tidak wajar dipandang enteng. Justeru, pernahkah terfikir bagaimana para wanita ini mencari keseimbangan antara kerjaya, rumahtangga dan diri sendiri di sebalik sejumlah ‘topi’ atas pundak mereka?



Sumber: <https://depositphotos.com/vector-images/multitasking-woman.html>



Sumber: LPPKN

Kajian Penduduk dan Keluarga Malaysia Kelima (KPKM-5), 2014 oleh LPPKN mendapati 18.7 peratus wanita yang sedang bekerja menghadapi masalah dalam mengimbangi peranan antara kerjaya dan keluarga. Hasil tinjauan mendapati masalah keseimbangan ini berlaku dari aspek kurang masa bersama keluarga (51.9 peratus), masalah penjagaan anak (13.0 peratus), kurang masa untuk diri sendiri (11.9 peratus) dan bebanan tugas di tempat kerja (11.2 peratus). Jadi apa boleh dibantu? Hargai mereka. Jadilah pendengar yang setia. Sebagaimana lelaki yang punya tekanan di tempat kerja, wanita juga sama. Terkenal seantero dunia, wanita makhluk yang paling beremosi kan? Belilah jiwanya. Belailah mereka. Wanita ini mudah dipujuk sebenarnya. Tapi jika dapat emas seurat dua pun ok juga kan? Sese kali apa salahnya. Hehe.

Dari imej di atas, terdetik rasa, kuat dan tabahnya kita sebagai wanita. Masih terngiang kala PKP bermula, dan sesi pembelajaran ODL dipraktikkan pada masa yang sama. Lepastu PdPR pula masuk dalam cerita. Sambung belajar juga. Bertambah-tambah ‘topi’ pada satu tika. Pernah juga beberapa kali bertukar menjadi ‘singa’. Anak kecil lagi. Memasak lagi. Bimbing kerja sekolah anak lagi. Siapkan bahan kelas *online* lagi. Jam latihan? KPI penulisan? Semua perlu laksana dalam masa yang sama. Tapi itulah, bersyukur masih ada kerjaya. Bersyukur gaji tak dipotong juga. Bersyukur dapat luang masa sepenuhnya dengan keluarga. Bersyukur punya sistem sokongan yang sangat kuat di sekeliling, suami yang sangat membantu dan memahami, emak yang boleh bantu tengokkan anak-anak. anak-anak yang faham bila *mommy* kunci pintu bilik untuk ambil masa menyendiri buat kelas dan penulisan, dan sahabat-sahabat sejati yang positif hinggakan boleh *Google Meet* kongsi cerita sesama. Syukur. Syukur. Syukur. Lantas, berapa banyak ‘topi’ atas kepala pun tak terasa sangat bebannya, bila terbit rasa mensyukuri dalam jiwa. Buat seikhlas dan semampunya. Inilah jihad kita, dalam kerjaya dan rumahtangga. Inilah sedikit coretan tinta, kisah ‘topi wanita’; ceritera perjuangan antara kerjaya dan rumahtangga, dari kacamata seorang Maizura. Eh, dah kira berapa ‘topi’ yang anda semua ada? Alhamdulillah, semua itu lubuk pahala.

“Maka nikmat Tuhanmu yang manakah yang kau dustakan?” (ar-Rahman: 13).